

A- Čoahkkinbeavdegirji

RiddoDuottarMuseat

RDM stivrračoahkkin Anáris Suomas 27–28.6.19.

Čoahkkin dollojuvvui dii. 18:00–19:00, 27.6 Inarin Kultahovi,

Siiddas 28.6.19 dii. 0800–11:30, Oahppočoahkkin siidda bargiide ja oahpisteapmi magasiinnas ja čájáhusas dii. 12.30–15.00.

Geat oassálaste:

Johan Ailo Kalstad	Stivrrajođiheadji
Hilde Skanke	Nubbijođiheadji
Ann Britt Eira Sara	Stivrralahttu
Hjalmar Strømeng	Stivrralahttu
Sten Magnar Nikodemussen	Stivrralahttu
Marianne Balto	Stivrralahttu
Svein Atle Somby	Stivrralahttu
Elle Bals	Stivrralahttu/bargiidáirras
Anne May Olli	Čáli, Direktvra guđii čoahkkima áššis 18/19.

Áššenr.:

ÁŠŠI

12-2019 **2018 rehketdoallu. Dohkkehuvvon e-poasta bokte 04.06.19**

13-2019 **Dohkkehit čoahkkingohččuma ja áššelisttu**
Čoahkkingohččun ja áššelistu dohkkehuvvui ovttajienalaččat rievdadusain ahte ášši 24/15 giedáhallo čoahkkáigeasus eará áššiid vuolde.

14-2019 **Válljet guoktása geat dohkkeheaba čoahkkinbeavdegirjji.**
Ovttajienalaččat válljejuvvuiga Svein Atle Somby ja Hjalmar Strømeng vuolláičállit otná beavdegirjji.

1. DIEHTOJUOHKINÁŠŠIT

- 15-2019** Diehtujuohkináššit
- Dán jagi rehketdoallu dássáži
 - Statsbygga vejolašvuodaguorahallan – movt dál lea
 - Organisašuvdnaovdánahttin – progrešuvdna
 - Ášši 24/15: Organisašuvdnastruktuvra
 - Bååstede šiehtadus vuolláičállon 19.6
 - Dialogačoahkkin Kulturráđiin ja KUD:in mas fáddá lei Stuoradiggedieđáhus museaid birra

- ICOM museaehtalaš njuolggadusaid geahčadit, ásahan álgoálbmogiid áššedovdilávdegotti gos RDM lea fárus.
- VAPPUS guide applikašuvdna
- Okta bargi lea čađahan vistesuodjaleami bachelora
- BONO:in ráhkadan ásašusšiehtadusa 24.6.19
- Berlin 1-4.7.19
-

Mearrádus: Stivra váldá vuhtii áššiid. Ášši 24/15: organisašuvdnastruktuurra loktejuvvo áššái 20/19.

2. ČUOVVOLEAMIT

Eai leat áššit

3. MEARRÁDUSÁŠŠIT

Ášši 16-2019 **2018 jahkedieđáhus**

- 1) Áššebáhpirat:
- 2018 jahkedieđáhus

- 2) Áššemeannudeapmi:

2018:s čuožai nuppástuhttinbargu ja eretcealkin hui ollu, muhto goitge oaččui RDM ollu fuomášumi earret eará sámi dáidagiin, árbevirolaš máhtus fanashuksenproseassain ja vistesuodjalemiin. RDM doaimmas lei 2018:s positiivvalaš ovdáneapmi.

- 3) Mearrádusevttohus:
Dohkkehit 2018 jahkedieđáhusa
- 4) Mearrádus: Dohkkehuvvon ovttajienalaččat.

Ášši 17-2019 **Skuvvanvári viessoláigoheami eretcealkin**

- 1) Áššebáhpirat:
 - RDM ja Porsáŋgu gieldda 2006 doaibmašiehtadus
 - HEMIS 2018 raporta sisáimmu birra
 - MYCOTEAM analysaraporta
 - Skuvvanvári gilisearvvi, Porsáŋgu gieldda ja RDM-Porsáŋgu musea ovttasbargošiehtadus ja viessoláigohanšiehtadus.
 - Porsáŋgu gielddastivrra 18.10.18 áššečielggadeapmi ja mearrádus

- Gilisearvvi 180219 čoahkkkinreferáhtta, gilisearvvi 180219 notáhtta RDM čoahkkima maŋŋá ja RDM siskkáldas notáhtta 180219 čoahkkkinreferáhta birra.

2) Áššečielggadeapmi

2017:s mearridii RDM iežas 2017-2022 strategiiaplána. Plánas daddjo ahte Porsáŋggu musea láigoha visttiid sihke Skuvvanváris ja Leavnnjas, ja ahte dát visttit eai leat heivehuvvon ođđaáigásaš museadoibmii. RDM strategiiaplánas čuožžu ges ahte RDM:s galget leat visttit mat heivejit RDM boahhte áiggi sisdollui. RDM doaibmašiehtadus eaiggádiiguin mearrida RDM doaimma ja RDM ferte danne oažžut eaiggádiin fápmudusa dahkat rievdadusaid maid áiggoše.

Mandáhtta

2006 doaibmašiehtadus gaskal RDM doaibmavuodđudusa (dalle gohčoduvvui Nordvestsamisk museumssiida) ja Porsáŋggu gieldda;

Doaibmašiehtadusa 3. mildosis čuožžu čuovvovaččat Skuvvanvári lokalitehta birra:

(Sitáhtta lea jorgaluvvon dárogielas)

“Museas lea čájáhus Skuvvanváris boares skuvlavisttis man Porsáŋggu gielda dál eaiggáduššá. Porsáŋggu musea geavaha oasti visttis iežas soahtehistorjjálaš čájáhussii. Doaibmaovddasvástádus ja čájáhusa hálddašanriekti sirdojuvvo Davvioarjesámi museasiidii. Porsáŋgu gielda joatká eaiggáduššat dan.”

Skuvvanvári birra lea maid ná 5. mildosis:

(Sitáhtta lea jorgaluvvon dárogielas)

“Porsáŋggu musea lea maid bargan Porsáŋggu ja Finnmárkku soahtehistorjjáin ja áigu bargat dáinna viidáseappot Skuvvanvári čájáhusa doalahemiin. Čájáhusa ođasmahttimiin ferte bargat.”

Porsáŋggu gielddastivra lea 18.10.2018 čoahkkimis dahkan dákkár mearrádusa:

(Sitáhtta lea jorgaluvvon dárogielas)

“Gielddastivra mearrida ahte RiddoDuottarMuseat Porsáŋggu museas, RiddoDuottarMuseas ja Porsáŋggu gielddas ferte leat mihttun ahte RiddoDuottarMuseat Porsáŋggu museas galget leat heivvolaš visttit Leavnnja guovddážiis”

Dán mearrádusa mielde lea RDM:s váldi bargat Porsáŋggu musea oččodit Leavnnja guovddážiin.

Ođđa soahtehistorjjálaš čájáhus ráhkaduvvui 2016:s ja Skuvvanvári gilisearvi lea ožžon fáldalaga dan atnit luoikkas jus RDM fárra. RDM Porsáŋggu musea bargá gávdnan dihte digitála čovdosa mainna gaskkusta Lasarettmoen soahtehistorjjá (digitála oahpisteami applikašuvdna). RDM lea nu deavdán 5. mildosa.

Doaibmašiehtadusa mildosa eavttut eai šat gusto dál danne go Porsáŋggu gieldda ii šat eaiggáduša Skuvvanvári visttiid. RDM lea dálá visteeaggádii fállan luoikkas oasi dálá soahtehistorjjálaš čájáhusas jus RDM fárra. RDM:s leat luoikkas dávvirat doppe mat gullet eará museaide, ja dáid šiehtadusaid ii áiggo RDM joatkit go daid áigi dievvá. Namuhuvvon dieđuid dihte berre doaibmašiehtadusas Porsáŋggu gielddain sihkkut sihke 3. ja 5. mildosa. Ášši ovddiduvvo Porsáŋggu gieldii.

Ekonomiija ja servvodatrolla

Skuvvanvári gilisearvi eaiggádušša Skuvvanvári boares skuvlavistti ja RDM máksá viessoláiggu mas Porsáŋggu gieldda gokčá 50 %. RDM máksá maid 75 % vistti jahkásaš elrávdnjegoluin. 2018:s lei viessoláigu 99 392 ruvnno, mas Porsáŋggu gieldda mávssi 63090,- ruvnno. 2018:s ledje elrávdnjegolut 61 933 ruvnno. RDM 2018 golut, elrávdnji ja viessoláigu, ledje 105 525 ruvnno. Dát leat golut museii mii lea dušše geassejahkebeali áigodaga rabas ja jus dingojuvvo dollojuvnot rabasin. Eanas oasi jagis eai leat RDM:s doaimmat visttis, earret dan ahte musea čoakkáldat vurkkoduvvo doppe miehta jagi. 2018 guosselogut: 432.

Dálá viessoláigu maid RDM máksá Leavnnja guovddášis lea 16 000 ruvnno mánnui, mii jagis dahká 192 000 ruvnno. Dasa lassin leat elrávdnjegolut sullii 25 000 ruvnno jagis. Dan dihte go lea seamma báikkis go Kvena giellaguovddáš de gokčá Porsáŋggu gieldda oasi oktasaš lanjaid viessoláiggu, ja maid liigeareála viessoláigogoluid mat leat Kvena giellaguovddášii (oktiibuot 144 000 ruvnno máksá gieldda). Doppe leat RDM:s doaimmat miehta jagi ja eanas geavaheaddjiavkkut mat leat mánáidgárddit ja skuvllat besset dohko vácci. Báikki + doaimmaid 2018 guosselogut: 2145.

Jus Porsáŋggu musea doalaha dušše ovttá báikki de unnot maid doaibmagolut, dego omd. kánturdávvirat (mánjenmašiidna, dihtorat, máksinmašiidna jna.), mátkegolut, geassebargit, liige alárba, liige ruskagurrengolut, liige telefodna ja eará dinggat maidda lea dárba buot musea báikkiin. Ii leat rehkenastojuvvon man ollu seasttášii jus eai livčče dát golut.

Eai leat dušše ekonomalaš ákkat mat čujuhit ahte livččii vuogas ahte RDM čohkke doaimmaidis ovttá báikái Porsáŋggu gielddas. Bargoáigi geavahuvvo mátkkoštit báikkiid gaskkas, ja nu gollá áigi mátkkošteapmái man sáhtášii geavahit bargat museas. Dasa lassin lea nu ahte ii leat bargoustitbiras/fágabiras dan dihte go bargit leat iešguđetge sajiin, ja dat fas čuočá bargobirrasii negatiivvalaččat. Lassin leat heajos bealit guohpahástalusat mat leat Skuvvanvári visttis ja dan ahte doppe váilot vejolašvuodát mat livčče sávahahtti museas. RDM Porsáŋggu musea nagoda deavdit iežas servvodatrolla buorebut jus čohkke ja nanne resurssaidis Leavnnja guovddášii.

Eará vejolaš čovdosat

RDM Porsáŋggu museas eai leat dál vejolaš čovdosat čoakkáldaga vurkkodeapmái. RDM:s lea jagi eretcealkináigi Skuvvanváris ja dán áiggi áigut geavahit čoakkáldaga páhkemii ja sirdimii. Leavnnja guovddášis leat visttit gos RDM lea fitnan mat sáhttet heivet vurkkodeapmái, ja mii leat Skuvvanvári gilisearvi dieđihan ahte mii ain háliidit láigohit garaša stuorit dávviriidda mat doppe

vurkkoduvvojit (busse jna.). Jus eat leat gávdnan heivvolaš vurkkodanbáikki dávviiridda ovdal go eretcealkinágodat nohká de lea mis vejolašvuohta vurkkodit dávviirid Kárášjogas SVD:s. Jus čoakkáldat gaskaboddosaččat vurkkoduvvo Kárášjogas de dat ii čuoza čoakkáldaga doaimmaheapmái seamma ládje go Skuvvanváris dagai. Dat lea dan dihte go oktasaš resurssat leat čohkkejuvvon SVD:i ja dat sáhttet leat veahkin (nu ahte ii leat dárbu vuoddjât Leavnnjas juohke háve go áigu iskat juoidá). Dasa lassin lea SVD vurkkodandilli buoret go Skuvvanváris. Maŋŋá go dáiddačoakkáldat sirdojuvvui SápmiKo:i de lea sadji gaskaboddosaš vurkkodeapmái. Dan dihte lea vejolaš eretcealkit viessoláigošiehtadusa Skuvvanvári giliservviin vaikko vel vurkkodeapmi ii leat vel čielgan.

Boahtte áigái áigu RDM ovttas Porsáŋggu gielddain gávdnat Porsáŋggu museai buoret ja eambbo heivvolaš báikki. Lea maid áigumuš ahte Porsáŋggu guovllu dávvirat máhcahuvvojit Norgga álbmotmuseas BÅÅSTEDE oktavuodas. Diekkár máhcaheapmi diedusge eaktuda ahte leat dohkkehuvvon magariidna- ja čájáhuslanjat. Dál mis váilot dakkárat.

RDM:i lea dehálaš ahte Porsáŋggu musea oažžu stivrras válddi sirdit doaimmaset Leavnnja guovddážii. Váikko vel RDM sirdá musea doaimmas guovddážii de lea RDM positiivvalaš ain ovttasbargat Skuvvanvári giliservviin ná:

- a. RDM vurkkoda ain dávviirid garášas
- b. Skuvvanvári gilisearvi beassá doalahit oasi Skuvvanvári čájáhusas ja gaskustit soahtehistorjjá čájáhusain ja Lasarettmoen bálgáin. Vejolaš bileahttaruđaid ožžot ieža.
- c. RDM-PM joatká ovttasbarggus giliservviin ja čađahit singuin ovttas prošeavttain dego Vuolojoga johkafanas dokumentašuvdna, geassemánu 14. beaivvi 2019 rahpat fas Lasarettmoena ja applikašuvnna almmuheamis.

3) Mearrádusárvalus:

RDM heaittiha viessoláigošiehtadusa Skuvvanvári giliservviin 01.07.2019. Eretcealkinági lea jagi, gitta 01.07.2020 rádjái.

4) Mearrádus:

Stivra mearrida eretcealkit viessoláigošiehtadusa Skuvvanvári giliservviin 01.07.2019 rájes. Sivvan dasa lea RDM bargiid bargodilálašvuohta ja RDM oppalaš viessoláigogolut Porsáŋggu. Eretcealkinági lea jagi, 01.07.2020 rádjái. RDM áigu váikkuhit nu ahte čájáhus sáhtta ain bisuhuvvot earret eará dainna ahte gilisearvi sáhtta luoikkas oažžut čájáhusa. Stivra áigu maid ávžžuhit Porsáŋggu gieldda ja eará beroštahttit gávdnat buriid čovdosiid čájáhussii ovttas Skuvvanvári giliservviin.

Stivra eaktuda ahte doaibmašiehtadus Porsáŋggu gielddain ođasmahtto nu ahte dat heivehuvvo dálá museabáikkiide Porsáŋggu.

Ovttajienalaččat mearriduvvon.

1) Áššebáhpirat:

- Áššemeannudeaddji: stivrajodiheaddji Johan Ailo Mattias Kalstad

2) Áššečielggadeapmi:

Dálá direktevra Anne May Ollis lea mearreáiggevirggis mii nohká 26.05.2020. Olli bargošiehtadusas čuožžu ahte mearreáigi sáhhtá ođastuvvot ovttain vel áigodagain mii lea 5 jagi. RDM njuolggadusaid mielde lea stivra mii virgáibidjá direktevrra, ja danne lea stivra mii mearrida galgá go Olli mearreáigi jotkot ovttá vel áigodaga. Vejolašvuotta virgádit alimus jodiheaddji lea maid Bargobiraslága §14–10 mielde.

RDM stivrras leat oalle unnán čoahkkimat ja danne berre vejolaš virgáibidjanproseassa álggahit nu árrat go vejolaš ja jus lea dárbu almmuhit de berre dan dahkat njuolga maŋná geasseluomu. Dan dihte berrešii stivra dán čoahkkimis mearridit lea go dárbu almmuhit virggi vai háliida go stivra ahte mearreáigi ođastuvvo.

Stivrajodiheaddji evttoha ahte mearreáigevirgi jotko nu go Olli bargošiehtadusas čuožžu. Dát lea vuosttažettiin dan dihte go Olli barggus leat buorit bohtosat:

- Čađahan gáibideaddji ođđasisorganiserema dan strategijja mielde man stivra mearridii 2017:s
- Lokten dáiddamuseaášši politihkalaš dássái (ođđasis) earret eará kreatiivvalaš ovttasbargguin Davvi-Norgga dáiddamuseain.
- Nannen oinnolašvuoda ja leamašan dehálaš jietnan Sámi museaide sihke riikadásis ja internationála dásis.

Stivrajodiheaddji oaivvilda maid ahte stivra berre deattuhit kontinuehta barggus mii lea oččodit dáiddamusea ja buori bargobirrasa. Stivrajodiheaddji deattuha erenoamáš ollu dan maŋemusa, dan dihte go lea leamašan gáibideaddji ođđasisorganiseren ja go leat bidjon johtui buorit organisašuvdnaproseassat maid áigumuš lea hábmet buori ja nanu bargobirrasa gos buohkat barget seamma guvlui.

3) Mearrádusárvalus:

Stivra guhkida direktevrra Anne May Olli mearreáiggi ovttain áigodagain, nugo čuožžu bargošiehtadusas man Olli lea vuolláičállán 2015:s. Ođđa mearreáigi álgá 27.05.2020 ja loahpahuvo 26.5.2025.

4) Mearrádus: Mearriduvvon ovttajienalaččat

1) Áššebáhpárat:

- Dohkkehuvvon bušeahtta 2019,

2) Áššemeannudeapmi:

Sisaboađuid rievdamat geažil dohkkehuvvon bušeahtta 2019 ferte reviderejuvvot.

Mii oaččuimet 400 000,- doarjaga Finnmárkku fylkagielddas (FFG) dáiddačoakkáldaga digitaliseremii Fylkagieldda bušeahtadivvuma olis 14.03.19. Dát doarjja juhkkjuvvon ná: 150 000,- manná bálkái, 50 000,- rusttegiidda 2019:s, ja 200 000,- sirdjuvvon jahkái 2020. Jus rusttegiidda várrejuvvon ruđa ovdas fidnet oastit visot rusttegiid maid dárbbasit, de olles supmi jagis 2020 manná bálkágoluide (olggobeale veahkki digitaliseremii).

Sámediggi dohkkehii reviderejuvvon bušeahtta 5.6.19, ja RDM oaččui 500 000,- njuolgadoarjaga ođđa musea ja dáiddamusea ceggema guorahallamii (vejolašvuodaid guorahallan). Dat doarjja máksjuvvon njuolgg Statsbygg:ii, muhto boahat liikká oidnot min obbalaš bušeahtas Sámedikki doaibmadoarjjan 2019.

RDM láigoha kantuvrasajiid Jáhkovuona mearrasámi museai Jáhkovuona Nærbutikken:is. Dát viessu lea dál divvuma vuolde, ja dan geažil mii eat dárbbas máksit kantuvraláiggu moatti mánnui. Doaibmarámma lea dan dihtii vuoliduvvon 50 000,- rádjái.

Mearrádusa mielde áššis 9/18, 13.03.18 lea gitta 300 000,- iežaskapitála (oamikapitála) várrejuvvon ásahusa ovdánahttinbargui (bargobirasdoaimmat). Doaibmabijuide gullet bargiidčoahkkaneami ja olggobeale konsuleantaveahkki, Organisasjonspsykologene Skare bokte. Iežaskapitála golaheapmi dahká vuolláibáhca 2019:s. Mii leat várren 300 000,- dán bargui musea dábálaš bušeahtas 2019:s. Maŋemuš bargiidčoahkkaneami rádjái, mii lea borgemánus, lea golahuvvon 293 000,-. Dat mielddisbuktá ahte mii gártat gokčat oasi iežaskapitálas, jus mii eat sáhte seastit eará bušeterejuvvon doaimmain nuppi jahkebeales.

RDM bušeahttarámma 2019, dohkkehuvvon njukčamánu:

Sisaboađut: 14 205 977,-

Bálkágolut kr. 8 273 161,-

Doaibmarámma kr. 5 932 816,-

Oktiibuot 2019 kr 14 205 977,-

Reviderejuvvon bušeahttarámma geassemánu 2019:

Sisaboađut: 14 355 977,-

Báikágolut kr. 8 423 161,-

Doaibmarámma kr. 5 932 816,-

Obbalaš bušeahtta 2019 kr 14 355 977,-

Badjelbáza kr 200 000,- lea FFG digitaliserendoarjja mii sirdojuvvo jahkái 2020 (juhkkojuvvo guovtti jahkái). Oktiibuot kr. 14 555 977,- sisaboađut 2019:s.

3) Mearrádusevttohus:

Reviderejuvvon bušeahhtarámma geassemánu 2019:

Sisaboađut: 14 355 977,-

Báikágolut kr. 8 423 161,-

Doaibmarámma kr. 5 932 816,-

Obbalaš bušeahtta 2019 kr 14 355 977,-

Badjelbáza kr 200 000,- lea FFG digitaliserendoarjja mii sirdojuvvo jahkái 2020 (juhkkojuvvo guovtti jahkái). Oktiibuot kr. 14 555 977,- sisaboađut 2019:s.

4) Mearráduš: Ovttajenalaččat mearriduvvon

4. DIGAŠTALLANÁŠŠIT

Eai lean eará áššit.

5. ČOAHKKÁIGEASSU

Ášši 20- 2019

Eará áššit

Ášši 24/15 – Organisašuvdnastruktuvra, 24.6.15 čeahkkim

Mii leat čuvvon dan organisašuvdnavuogi modealla mii mearriduvvui čeahkkimis geassemánu 24. beaivvi 2015. Mis leat doaibmi museajođiheaddjit ossodagain ja mii leat nannen báikkálaš čanastumi hui ollu 2015 rájes. Earret eará báikkálaš doaimmaiguin gos ovttasbargat eará báikkálaš ásahusaiguin. Báikkálaš museajođiheddjiin lea stuora iešmearrideapmi leamašan earret eará báikkálaš bušeahtain, rahpanáiggiin, fágalaš ovdáneamis (kursen jna), ovttasbarggus ja proševttain. Dan rájes lea ollu mearrádusas dahkkojuvvon ja earret eará de juovlamánu 3. Beavvi 2015 stivračeahkkimis mearriduvvui (áššis 36/15) ovddasvástádusa delegeren direktivrras báikkálaš museajođiheddjiide. Áššis 36/15 guđđojuvvui temáhtalaš spesialiseren, muhto dát lea goit namuhuvvon strategijadokumeanttas oasis

gaskaáiggi siste ovdáneamis. Mii guoská Kárášjoga magariidnii de lea ain ášši jođus Sámedikkiin ja Statsbyggain mas justte dál bargat vejolašvuodanalysain.

Geassemánu 14. beaivvi stivračoahkkimis (ášši 15/16) mearriduvvui bidjat johtui strategijaproseassa mii loahpalaččat mearriduvvui geassemánu 26. beaivvi 2017:s (ášši 15/17). Strategijaplánas daddjo ahte museafágalaš bargu galgá nannejuvvot ja hálldahus unnut. RDM lea čađahan guhkes ođđasisorganiserenproseassa ja bargiidlogu unnideami, ja dál leat ollen dán organisašuvdnaovdánahttinproseassa loahpageahčái. Dát strategija lea maid boadus stivrra 2/5-2016 mearrádusas, ášši 4/16, mii lea ná: “Stivra berre 2016:s árvvoštallat doaimmaid mat dahket ahte RDM goluid- ja sisaboaduid dássi lea ceavzil” (sitáhtta jorgaluvvon dárogielas). Bargiidlogu unnideapmi lea oassi dás (golud ja sisaboadut fertejit leat seamma).

Dat mii ii leat čuovvuluvvon geassemánu 2015 mearrádusa mielde lea sirdin vuodđudusas – oasussearvin, ja ahte dát galggai dáhpáhuvat ovdal 01.01.2017. Muhto, strategalaš barggus mii bidjui johtui geassemánu 2016:s lea dát oassin boahtte áiggi strategalaš plánas. Strategijaplánas mii mearriduvvui čuožžu guhkesáiggi ovdáneamis ahte eaiggátstruktuvrra galgá árvvoštallat, eandalii dalle go dáiddamusea duohtandahkkojuvvo.

Mii leat viežžan fáldadaga Barentz advokat AS:s, borgemánu 21. beaivvi 2015. Dán fáldadagas boahtá ovdan earret eará ahte rievdadangelbbolašvuohta lea vuodđudusbearráigeahčus (stiftelsestilsynet). Dat mielddisbuktá ahte RDM ferte ohat vuodđudusbearráigeahčus vuodđuduslága §46 mielde – mas leat njuolggadusat nuppástuhttimii;

(Jorgaluvvon dárogielas)

Nuppástuhttin sáhtá čađahuvvot dalle go mearrádus njuolggadusain mat leat, dahje lágalaš disposišuvdna mii lea, vuodđun vuodđudussii

- a) ii sáhte ollašuvvot. Omd. dan dihte go vuodđudusa ruhtadilli ii leat doarvái olahit dan doaimma buori ládje
- b) čielgasit ii leat dárbbalaš
- c) lea nuppe gežiid go dat disposišuvdna mii lea vuodđun vuodđudussii, ovdamearkka dihte go ásaheaddji eavttut mearrideapmái eai leat doaibman, dahje
- d) lea čielggas ahte ii leat buorre dahje čielgasit lea jierpmeheapme

Jus mearrádus ii fáttmas vuodđudusa ulbmila, ja ahte ásaheami oktavuodas ii leat dát doarvái bures váldon vuhtii, sáhtá nuppástuhttin dahkkot go čájehuvvo ahte njuolggadusat leat heivetmeahttumat dahje ulmeheamit.

Leat ollu formála gáibádusat mat fertejit čuvvojuvot, ja leat olu duođaštusat maid ferte čohkket vai sáhtášii čađahit nuppástuhttima. Barentz advokat AS ii leat árvvoštallan dohkkehivččego vuodđudusbearráigeahčču obanassiige nuppástuhttima, dan dihte go dat lea čadnon dasa makkár ákkaiguin stivra háliida čađahit nuppástuhttima. Barentz advokat AS lea 2015:s árvvoštallan ahte mávssašii badjelaš 170 000 ruvnno dán dahkat. 2015:s lei nuppástuhttinsávaldat vuodđuduvvon geassemánu 3. beaivvi 2014 Storsulrapportii, mii dajai ahte oasussearvi livččii vuohkkasut organisašuvdnavuohki go vuodđudus. Dat lei earret eará vai buot eaiggádat oččoše iežaset eaiggátvuodarolla generálačoagganeamis.

Ođđa organisašuvdnastruktuvra mearriduvvui seamma stivračoahkkimis ja seamma áššis go dat mas mearriduvvui vuodđudusa nuppástuhttin oasusovttastupmin. Njeallje jagi maŋná, go buot eaiggádiin lea miellahttu stivrras ja gos guovddášis lea leamašan báikkálaš ovtasbargu – de mis lea buorre ovdáneapmi mii lea dáhpáhuvan nu go lei sávahahtti 2015:s, čuovvu maid Storsulraportta, váikko vel RDM ain lea vuodđudus.

Go lea nu guhkes áigi gollan stivrra 2015 mearrádusa rájes, de jearrat dál stivrras ahte galgat go:

- 1) ain eambbo čielggadit ášši dainna 50 000 ruvnnuin (earret MVA.) mii lea juolluduvvon dán bargui ja loktet ášši stivrii
- 2) loktet ášši stivrii daiguin dieđuiguin mat mis dál leat, ja eat šat guorahallat ášši eambbo
- 3) manjdit ášši dassážiigo dáiddamusea lea ásahuvvon ja dasto árvvoštallat eaiggátvuodastruktuvrra strategiiaplána ektui.

Mearrádus: Ášši manjduvvo dassážiigo dáiddamusea lea ásahuvvon ja dasto árvvoštallo eaiggátvuodastruktuvrra strategiiaplána ektui.

Duodaštetne ahte referáhtta lea riehta:

Svein Atle Somby
Stivrralahttu

Hjalmar Strømeng
Stivrralahttu